

摘藻堂四庫全書薈要

集部

欽定四庫全書薈要卷二萬五百十六

集部

明詩綜卷四十三

翰林院檢討朱彝尊編

文徵明 十五首

徵明初名璧以字行更字徵仲長洲人以歲貢入京用薦授翰林待詔卒私諡貞憲先生有甫

田集

顧華王云徵仲七言詩愜當飄逸唐風宋語兩相融化自是一機軸也又云文璧蔡

羽徐楨卿邢參藻詞成章雅論合則雖方古作者未能卓然而碩學茂才固今之雋傑矣王

元美云文徵仲如仕女淡妝維摩坐語又如小  
閣疎窗位置都雅而眼境易窮又云先生詩傳  
情而發娟秀妍雅出入柳柳州白香山蘇端明  
諸公間俞汝成云徵仲詩似晚唐參以元調  
穆敬甫云徵仲書法高一代詩亦秀雅可傳  
顧玄言云待詔詩從實境中出特調稍纖弱  
耳陳卧子云衡山  
詩尚平實韻致却勝

靜志居詩話先生人品第一書畫詩次之胥臺  
袁氏十懷詩其一云內翰小子師卓行古人傑  
辭金抗幼齡解組修晚節丹青紛雲烟篇翰爛  
虹蜺瑚璉世所珍昭代表三絕可謂片言中倫  
矣先生嘗語何孔目元朗云我少年學詩從陸  
放翁入故格調卑弱不若諸君皆唐音也然則  
文之佳惡先生得失自知豈與左虛子輩妄自  
夸詡者比哉今甫田集詩十五卷集外流傳者

尚多蓋先生作書最勤兼畫必留題予嘗見所  
寫朱竹即以朱書題詩其上惜無好事者廣搜  
為續集也曩從父維木公治別業於碧漪坊北  
池荷岸柳有軒三楹懸先生手書於壁即池上  
一詩少時諷誦至今猶未遺忘因附錄之視集  
中所載尤出塵瑤之表拾遺珠於滄海天下之  
寶當與天  
下共之矣

### 早起露坐

炎宵不能寐起坐褰絺幘星麗中天明河連曙暉涼  
風不滿鬢落月猶在衣中庭草木稠宿露朝未晞人生  
亦旦暮急景無停機撫時懷美人欲往情依依暑寒互

推遷安得願無違

秋日同杜允勝湯子重游東禪寺次子重韻

人事無停機曦暉正流耀及茲東城游駕言謝紛要杪  
秋霽景澄寒原入高眺靜躁本無媒憂欣自人召靡靡  
霜藹明歷歷幽禽調獨行心已怡況也偕二妙燕談析  
玄旨悲吟發孤竅一語何足稽後期真未料微風西北  
來冷然雜清嘯

追和錢舜舉山居圖

翠深山帶屋綠淨水通門泉石情還重丘園道自尊種  
莎添野色留竹護籬根樂事惟心會休逢俗子論

飲酒

晚得酒中趣三杯時暢然難忘是花下何物勝尊前世  
事有千變人生誰百年唯應騎馬客輸我甕頭眠

何元朗云

雅致絕似  
白太傅

雪後

寒日晶晶曉溜聲中庭快雪一宵晴牆西老樹太骨立

窗裏幽人殊眼明想見漁蓑無限好怪來詩思不勝清  
江南殘臘相將盡會看門前春水生

新秋

江城秋色淨堪憐翠柳鳴蜩鎖斷烟南國新涼歌白苧  
西湖夜雨落紅蓮美人寂寞空愁暮華髮彫零不待年  
莫去倚闌添悵望夕陽多在小樓前

春日游支硎天平諸山

麥隴風微燕子斜雨晴雲日麗江沙遙尋支遁烟中寺

初見天平道上花過眼溪山勞應接方春草樹發光華  
夕陽半嶺歸輿急慚媿城中自有家

夏日同次明履仁治平寺納涼

竹根雨過石苔斑鐘梵蕭然晝掩關坐愛微涼生碧殿  
忽看飛雨失青山雲分暝色來天外風卷湖聲落樹間  
最是晚晴堪眺詠夕陽橫抹蓼花灣

滄浪池上

楊柳陰陰十畝塘昔人曾此詠滄浪春風依舊吹芳杜



陳迹無多半夕陽積雨經時荒渚斷跳魚一聚晚波涼  
渺然詩思江湖近便欲相攜上野航

致仕出京言懷

白髮蕭疎老祕書倦游零落病相如三年漫索長安米  
一日歸乘下澤車坐對西山朝氣爽夢回東壁夜窗虛  
玉蘭堂下秋風早翠竹黃花不負余

夜坐

殘月耿猶在流螢忽自飛一聲何處鶴露下欲霑衣

春日懷子重履約履仁

湖上花枝煖欲然  
寺前楊柳綠生烟  
憑君莫信春光早  
寶積山頭有杜鵑

題畫二首

新霜點筆意蕭蕭  
不盡秋光鴈影遙  
雙鳥欲浮天拍水  
夕陽人在虎山橋

江頭春水綠灣灣  
江上春山擁翠鬟  
老我輸他茅屋底  
無愁終日對江山

池上

單鳩喚雨雙鳩晴池上柳花縱復橫好風忽卷讀書幔  
及君到時春水生

蔡羽

三首

羽字九達吳縣人以太學生赴選授南京翰林

孔目有林屋南館二集

王元美云蔡九達如灌莽中薔薇汀際小鳥時

復嫣然一覽而已

穆敬甫云蔡詩冲雅不俗

顧玄言云蔡九達之整秀黃勉之之典麗王

履吉之華蔚顧行之之顥約陸子淵之清潤彭孔嘉之精彩可得並駕李時遠云九達薄少

陵為不足法可  
謂蚍蜉撼樹

詩話杜詩韓筆百世之師也人其可自絕乎孔  
目於詩文高自標許以少陵不足言所著者建  
安西京韓柳不足言所撰者先秦兩漢今其集  
具在篇無妍辭句無警策此猶淮南帝前自稱  
寡人夜郎天末不知漢大妄人也已其自序云  
古之言者必有得有所得而不言與無所得而  
言均非也其言誠是矣第不知何者為孔目所  
得雖有詩賦八百餘首文二百首恒河之沙鉤  
金安在縱使曲為  
解嘲其誰信諸

## 思田園

南方樹藝早嘉蔬當及時王官鑿水罷忽起田園思東

郊織臺笠西郭編茅茨田家不辛苦衣食當待誰曳裾  
京華塵徒然情四支

秋泉

我愛秋泉清况傍巖花滴魚游日光中倒見潭上壁

引奏後即事

金水荷花接綺軒石渠銀鑰掌中閣西崑學士封麻晚  
斜日猶開左闕門

湯珍四首

珍字子重長洲人以歲貢生除崇德縣丞遷唐

府奉祀不赴致仕歸有小隱堂詩草

王元美云  
湯子重如

鄉三老入城威儀舉舉終少華冶態  
王敬美云子重詩清雅恬和與文徵仲同調而駿駿時

欲度之

詩話子重十試不利晚就一官其之崇德時文  
徵仲作澹著色山水圖送之景甚蕭遠知其人  
定拔俗讀浪淘沙詞直詣劉賓客神境非五岳九  
達所能及也

### 觀雨作

溫風鬱蒸溽浮陰昏混茫始迷青嶂色繼隱朱陽光霏

霏灑甘澍浥浥潤下方竹添新籜翠草起枯荻黃熙然  
厚土內生意咸舒張憂時切經旱喜坐開山堂鑒彼造  
化機推遷自有常燥餘必反濕炎及乃回涼君子蹈恒  
運小人乖禮坊貪天鮮終克靜俟多徜徉

秋日遲文衡山先生不至

肅肅振飄風霏霏灑芳澍遲客向南軒徘徊倚庭樹  
裝戒星來傾曦未云赴

集本有得非為物牽無乃返中路鳥鳴不相求反已每自顧四

句我思鬱以煩孰克探其故沉憂抱孤景中結豈外慕

申訊吐清謠殷勤待良晤

浪淘沙

二首

淮河一道達清河如此風波可奈何東岸沙崩西岸長  
南船來較北船多

濫瀕瞿塘險未平衡沙惡浪總堪驚相逢盡說公無渡  
蜀道何曾斷客行

張靈

三首

靈字夢晉吳縣人



詩話孟晉狂生游技指生之門其畫山水足亞  
伯虎對酒一詩可稱絕唱臨終詩云垂死尚思  
玄墓麓滿山寒雪一林松如  
聆雍門之琴頑豔亦為淚下

春暮送友

三月正當三十日一壺一榼一孤身馬蹄亂踏揚花去  
半送行人半送春

對酒

隱隱江城玉漏催勸君須盡掌中杯高樓明月清歌夜  
知是人生第幾回

題唐子畏畫卷

黃茅渚頭熨斗柄唐子好奇曾屢遊太湖烟景此絕勝  
還許吾輩閒人收

凌震二首

震字時東烏程人正德中貢生黔陽儒學訓導

有練溪集

鄭莖畦云練溪  
詩清婉可誦

出宿

悠悠出門來戚戚念家室三里一回頭五里淚霑臆託

身百年中何必遠行役上攀猿鳥道下俯鯨人宅性命  
不足憐仕宦亦何益卓哉有陶公千載為我則倦鳥思  
舊林翩然返其翮

捉蝨

我先老妻眠解衣置熏籠老妻為捉蝨略與捕賊同明  
燈集女隸獲多者論功先之以緣督次則殺縫中旁蒐  
與輿討指殪兼牙攻聲言具湯沐會使巢穴空我聞雖  
不語慙恧無地容彼貴寢狐貂彼富錦繡蒙旬更月必

換日夕沉水烘何緣有胎媒使汝得潛蹤乃我衣垢敝  
遂為汝所宮澣濯既不時煬竈亦何功再思也不然肉  
甘汝攸從昔有嵇叔夜矯矯其猶龍又有王景略古所  
謂英雄伊豈乏富貴汝視如寒窮侵肌啞膚理戢戢攢  
銛鋒爬搔未始歇捫撮當王公吾何為汝諱不汝飢餒  
供

陳鐸一首

鐸字大聲下邳人睢寧伯文之曾孫世襲指揮

家南京有秋碧軒香月亭詩集

卞華伯云大聲詩用意和平不

務雕刻深入虞楊范揭之閫  
輿而漸登盛唐作者之階梯

宿牛首寺

到寺萬緣歇蕭然宿峰頂蒼蒼野色新  
漠漠秋烟暝天風在林末空翠散復整  
支郎繙經處松子落古鼎微涼入虛檐  
老鶴飲淺井相期話三生夜坐石根冷  
疎竹何蕭蕭雲房亂燈影

徐霖二首

霖字子仁吳人徙南京補諸生坐事削籍武宗  
南狩召見欲官之固辭賜飛魚服扈從還京後

歸里有麗藻堂豪

周吉父云子仁詩才篆  
法丹青樂府俱稱能品

詩話髯仙多能藝事書畫之外工填南北曲文  
徵仲贈詩云樂府新傳挑葉句彩毫偏寫薛濤  
箋所築快園康陵南巡所幸其居有晚靜閣宸  
幸堂浴龍池及扈蹕入都每夜宿御榻前與帝  
同卧起永陵之初威武近幸多逮治  
坐罪惟子仁脫然亦滑稽之雄也

舟中雜詠

二首

綠樹坐黃鸝青秧點白鷺睡起倚船窗知是江南路

今夜河西宿無眠但數更竝船何處客吹笛到天明

謝承舉一首

承舉初名璿字文卿既更名改字子象上元人

有野全子集

顧華玉云近時李西涯主清婉陳白沙主沉雅莊定山主渾雄竝尚

理致金陵有二才子謝子象徐子仁凌蹕詞苑徐得其婉謝得其雄然徐之學西涯與謝之學白沙定山皆虎賁之似中郎耳

陳羽伯云野全詩如奔流掣電時一驚人

吳歌

秦淮女郎歌柘枝隔岸吳兒調鳳絲  
聲聲互荅綠楊裏

正是離人腸斷時

金鑾 十二首

鑾字在衡隴西人僑居南京有徙倚軒橐

俞汝成云

山人詩多遠思別於常調

詩話白門詩家有金琮元玉金丹赤侯金大車  
子有金大輿于坤金銀竹溪均著詩集諸金之  
中吾必以在衡為巨擘焉其五七言近體風情  
朗潤譬諸斛角靈犀近之游塵盡辟矣至若明  
月照人千里共涼風吹面五更多尤為驚策

立秋日呈一二知己



久雨銷長夏涼風生早秋野航如市集江水入城流迂  
澗從人笑艱難豈自謀違時况多病寂寞戀交遊

登滄州城

渤海高人去仙臺古蹟存風沙吹不斷天地與同昏野  
水添新淥空烟集暮村故園桑柘裏悵望一銷魂

哭湯沂東開府

赤手揮戈日丹心報主時不曾辭力盡那復計身危夜  
雨藏兵峽秋風墮淚碑惟餘舊戎馬汗血至今垂

子房山

報主元非漢封侯豈為留早求滄海士晚伴赤松遊故  
國山猶在黃河水自流王孫歸去好春草徧芳洲

北河道中

叢臺北向通燕谷曲渚西流繞薊門歸鳥亂啼原上樹  
夕陽多照水邊村因悲俗吏趨三輔曾有新詩寄陸渾  
歲歲別來春又暮幾回芳草怨王孫

重過歌臺追憶髯仙竹谿二徐老

山公曾醉習家池  
潦倒當年舊接羈  
再過已驚非故主  
相逢元不是新知  
屏花帶雨春還麗  
水檻臨風晚更宜  
幾度壚頭覓嵇阮  
紫簫攜向月中吹

除夕

還憶去年辭白下  
却憐今夕在黃州  
空江積雪添雙鬢  
細雨疎燈共一樓  
世難久拚魚鴈絕  
家貧常為稻粱謀  
歸來故舊多凋喪  
愁對東風感壯游

送友人南還

錦堂歌出酒初陳銀燭燒殘月半輪青海共驚千萬里  
白頭相對兩三人伊州折柳傷遲暮江縣逢梅入小春  
去住關心各無那西風滿道起秋塵

感燕

故園門巷近烏衣但見花開燕子飛一自天涯與相別  
可憐春盡未知歸綠楊庭院傳聲杳芳草池頭顧影稀  
何處脩梁更堪寄日斜江上倍依依

九日喜河上寇平奉簡二三知己

聞道官兵下泗州五河羣盜已全收可憐白首重生日  
却喜黃花正及秋多病不妨連夜飲故人還為幾時留  
西風莫趁歸心急吹落清江數點鷗

春城曲

雨餘芳草遠萋萋春暖遊人信馬蹄日暮畫樓歸去晚  
落花香裏路東西

寄吳厚丘

黃金散作買花資白首誰能戀故知同作孟嘗門下客

西風吹鬢獨歸時

邢參一首

參字麗文吳人有處士集

詩話麗文獨者平生不事干謁苦志讀書除夜  
有海估以百金乞墓文峻拒之抱膝擁衣飢以  
待旦其介如是明初高侍郎季迪有北郭十友  
麗文亦有東莊十友吳燿次明文徵明徵仲吳  
奕嗣業蔡羽九達錢同愛孔周陳淳道復湯珍  
子重王守履約王寵履仁張靈孟晉故其詩云  
昔賢重北郭吾輩重東莊胥會誠難得同盟詎  
敢忘麗文遺集罕傳予從金處士侃借得手鈔  
本錄竹枝一首錢氏列朝詩神鬼門載桃花仕  
女詩八絕竹枝三首在焉其二則山桃花間紅

更紅西湖荷葉綠盈盈皆麗文集  
中詩所云紹興上舍葛榮夜飲圖中美人歌詩百絕侑觴乃好事者為之不足信也

竹枝詞

家住東吳白石磯門前春水浣羅衣  
朝來繫著木蘭櫂

間看鴛鴦作隊

一作飛對

王寵三首

寵字履仁更字履吉吳縣人以諸生貢入太學

有雅宜集

顧華玉云履吉詩刻尚風骨擺脫輕靡既正體裁復減蹊徑五言沉鬱類

曹植鮑昭七言跌宕類杜甫岑參近體與盛唐諸家相雄長  
袁永之云王履吉綺辭壯思滔滔不休其詩初宗李既宗杜去輕麗而就沉著尚鋪綴而略陶鎔  
王元美云王履吉如鄉少年久游都會風流詳雅而不盡脫本來面目又似揚州大宴雖鮮珍水陸而時有宿味  
穆敬甫云履吉詩如雨後芙蓉綽約有致  
俞汝成云履吉情孚義悉句秀字工在吳中可稱作者  
何元朗云王雅宜詩清警絕倫無一點塵俗氣真天上謫仙人也所欠者沉著耳中道而未見其止惜哉

詩話履吉亦中材爾諸公惜其早亡譽之未免過實

# 聽琵琶



紫塞傳龍撥崑丘學鳳鳴春風吹白雪總是斷腸聲司  
馬千行淚明妃萬里情當杯愁未已天末海雲生

一作橫

辛巳書事

居庸碣石控關門玉几由來北極尊閣道逶迤經海岱  
天河隱見出崑崙斗間遂識三階列日下從知九軌奔  
奠鼎卜郊非細事萬年圭鬯保文孫

虎丘送許仲貽

旗亭卮酒送君還去鳥流雲信宿間日暮銷魂此回別

望君重上虎丘山

沈翰卿 一首

翰卿字子羽江陰人儒學生有石灣集

懷施武陵子羽

天子觀射臨澤宮三矢中鵠欽英風鹿鳴嘉賓慨未逢  
高篇重許合大雅置之建安七子中

詩話子羽詩尚隱帖如此  
語雖未工取其立格疎硬

張 詩 一首

詩字子言本姓李宛平人有崑崙山人集

王元美云

張子言如甘州石斗  
色澤如玉膚理麤漫

詩話岳氏今雨瑤華以崑崙山人詩壓卷然詩  
實不工方棠陵謂之曰君詩雖佳第情實如無  
山稱山無水賦水非歡而暢不  
戚而哀是已是亦切中其病

送呂思抑募兵遼東

六郡募奇兵三韓列漢營  
甲光開絕塞海氣動高旌  
楊柳關山月梅花雨雪情  
引弓十萬衆不敢復橫行

鄭作

四首

作字宜述歙縣人自號方山子往來梁宋間李

夢陽流寓汴中招致門下有方山子詩選

汪禹又云

宜述詩大槩悲壯王仲房云宜述家本商賈讀書苦吟為人負氣任俠故其詩雄渾跌宕有

骨風

詩話宜述游汴際空同詩名未大盛時北面稱弟子以是空同深愛之何大復所云老鄭空同客也其詩經空同選擇序而傳之且為作方山精舍記又贈詩云近時好事最者誰徽州鄭生差愛我今觀其詩頗俊利遠勝五岳山人

聞鴈

秋日江南去春風塞北歸  
祇愁羅網密敢戀稻粱肥  
獨往寒天遠高飛舊侶稀  
游人夜不寐感爾淚霑衣

登高

萬里登高望烽烟接汴州  
愁生

一作添

飛鳥外心逐

一作亂

大江流弟妹今何在  
干戈卒未休前行塗路阻  
蹤跡且淹留

客中聞四弟消息

昨遇梁園使孤城舍弟居  
干戈長在目烽火不通書  
汝

計猶長缺吾心已敝廬兩鄉千里隔相望各需裾

除夕

除夕愁難破還家夢轉頻十年江海客孤館別離人殘  
漏聽還盡寒燈坐愈親梅花滿南國誰寄一枝春

程誥十一首

誥字自邑歛人有霞城集

李獻吉云程生詩神境融會足以散置名

家王仲房云自邑足迹半天下其詩得山川之助為多體裁既全篇章過富珠以沙迷反滋

識者之憾

詩話自邑好為汗漫之遊山川郡邑凡所經歷  
必紀以詩氣格專學空同第才情稍鈍色澤未

鮮五言庶  
稱具體

秋陟靈金之巔由范坑過舍頭至靈陽憩方氏山  
館

入山恨不深采芳思凌緬戒嚴事初程憑虛瞰前峴氣  
逼日始熾光滿露猶泣奔峭既厓陟盤曲亦磴轉步迅  
險易踰憩頻蔭難選俯眇巢枝禽仰聆吠風犬想像巖  
居人于焉傲軒冕瑤華若堪把白雲況在眼撫物興彌

敦觀化理誰遣試語同懷人  
竭來此棲衍

遊齊山

城市意弗適烟霞夙所尚  
逍遙越崇堤徙倚對層嶂  
峽存巨人跡亭紀使君創  
洞入身暫屈厓陟首屢仰  
雲竇凝不開石門屹相向  
寄隱集仙竟誰當  
名也尋覓悵遺跡歷覽訝殊狀  
來頻心有得興至情益放  
留連暮未返引領月欲上

自秀山深入陟巘



自我客秋浦秀山亦屢入顧茲奇勝多恨未徧探歷今  
晨興忽動捫葛履危岌石拂既久坐厓倚亦暫立香氣  
暗忽度碧光深可挹行迷儔侶遙喜溢僕御及飄飄驚  
風來陳陳吹雨急蠟屐早已著蘿衣不妨濕

登吳山

蘿磴凌晨上松門倚杖過風烟攬吳越表裏見江湖水  
遠雲俱白峰高日易晡賞心延縱目邂逅此山隅

登北固山

松林度幽僻蘿磴轉孱顏眺望堪千里東南有此山江  
流包楚徼地勢控吳關萬古登臨意風檣不暫閒

白沙逢余子陳却送之金陵

新詩滿行橐相見未遑論趁月浮江舸乘潮入郭門聽  
歌桃葉渡問酒杏花村羨爾遙乘興無由共舉樽

峽夕

楚塞連三峽巴雲暗五溪鄉心春鴈過客淚夜猿啼百  
丈緣流險雙厓壓樹低孤城丹巘麓江白露淒淒

夜泊乾灘寄肇之

江迴月娟娟蘆花渚路連暝沙團宿鷺風樹曳驚蟬廟  
祭傳儼鼓津喧索渡錢愁心付漢水遙寄秣陵天

市汊驛下阻風

江干日色黃北風怒不已君看上水船一日三百里

琵琶亭

殘照亭皋夕秋風旅鴈飛琵琶千載恨淚滿逐臣衣

洛下逢汪子明

我行西入秦驅車洛陽陌相逢故鄉親况是東歸客

高澥一首

澥字宗呂侯官人有霞居子集

詩話少谷居鰲峰北從之游者九人鄉鄰目為十才子少谷詩所云一時賢士俱傾蓋滿地萍蹤笑舉杯是也九人者高二十二宗呂居首傳二木虛次之餘有林九王七施二其名不得而詳矣宗呂家最貧少谷稱其事母至孝事兄至悌又稱其甘貧守節安安然人無知者蓋高傳為鄭門弟子之冠少谷於傳盛詩其文於高則美其行云

岳陽樓

巴陵城上岳陽樓樓外長江日夜流殘雨數聲衡岳曉  
暮霞孤鴈洞庭秋仙人夜奏沙邊笛估客春移樹杪舟  
十二危闌閒極目滿汀楊柳不勝愁

傳汝舟

三首

汝舟字木虛一名丹號丁戊山人一曰磊老侯

官人有前丘生行已外篇

鄭繼之云生詩淵致蕭散多發之性情其

道江湖林壑神仙隱逸直臻其要妙上下魏晉抗聲于武德天寶之間大歷而還不論也王

道思云汝舟才知文采足以得意仕進獨舍去而不好其舍之盡至於鄉井屋廬不復可居而

妻子不足畜也舉一世之榮利無足好而區區吟詠之工不能忘亦其才知所斂不可終藏而見之於此也王元美云傳汝舟如言法華作風語凡多聖少俞汝成云汝舟詭怪聲牙難於諷詠徐興公云汝舟詩雖師鄭吏部而天然之趣尤勝如雖貧一榻能高卧縱老名山恣遠尋異書自得作者意長劍不借時人看此等句吏部當為却步矣

詩話前丘生詩刻意學少谷子故多崛奇語句如楚樹懸猿直衝雲帶鴈斜宿雲長抱殿游鶴不歸松野客逢迎少山僧出入尊白為溟海浪青盡島夷山地濕菰蒲氣風生鶴鶴毛皆鎚鍊而出不肯猶人生弟汝揖有句云種桃求漢核食棗想齊花頗饒韻致汝揖字木刻亦有詩名時號二傅或是鼇峰九人之一乎

宿山心永樂

朝登三仰峰夕宿山心菴久入名山遊蹊徑頗盡諳始  
知九曲外復有南山南森邃更險豁深篁倚烟嵐沙田  
稻翼翼巖桂花毵毵疎籬隔雞犬朽樹藏蜂蠹嘗傳武  
陵原旁有捕魚潭伐木不到遠却留松與楠雲光卸秋  
屨回首望石龕經旬四攀眺偃息此日堪澗芹食轉美  
草榻卧正酣枕中有鴻寶何必問周聃

未至白塢投宿新坪農舍

雲洞更何許新坪又一村  
前林露微月半嶺聞驚猿  
野老不避人篝燈候茅屋  
始笑行路難百里已三宿

月下

月明坐空山不覺石苔冷  
猿嘯搖藤蘿亂我松桂影

傳汝楫一首

汝楫字木剡汝舟之弟有卧芝集

過石田草堂哭之

頻年我理吳航至幾度相逢  
笑口開沙雨江風今日淚



歲寒愁絕是重來

石麟一首

麟字永也桐城人

詩話永也白果歌載龍眠風雅未免冗長予為  
芟汰存之其曾祖英字內含正統間居郭北古塘  
享年一百有三生七子二十三孫有同庚友許  
澹初魏谿叟年九十時棄家學道不知所之內  
含百歲之日賦詩憶之云庚申共守人何在  
在甲午同生獨詠詩樹即內含所植也

白果樹歌

先人卜築闢榛蕪手種白果樹兩株愛他離離祇結實

曾無花謝花開日兩株樹各七分枝樹下人家亦七支  
聞昔莫莢葉象十二月南海一風草一節由來草木知  
先幾人中之幾知者稀

錢元善 一首

元善號存菴桐城人刑部尚書如京子以廕官  
都督府經歷終魯府長史

春日感懷

春風三月景依然弱柳游絲觸處牽家遠隔年無信到

官閒鎮日枕書眠  
林鳩逐婦晴還雨  
沙燕將雛去復旋  
遙憶故園春更好  
江樓背郭看鉏田

程佳一首

佳字令甫休寧人

獨坐

空館寂無人  
撼撼鳴木葉  
乍疑風雨聲  
忽見當窗月

陳璽一首

璽字德符閩縣人有守魯集

斑鳩

香禽自何處共立枝頭語喚起曉耕人西疇足春雨

徐定夫

一首

定夫字士安海鹽人有蛩吟藁

夜坐懷石林茶谷二上人

林秋萬籟集木葉下高岑佳人渺何許月明空此心夜  
久河漢沒涼風飄衣襟徘徊寂無語幽意託孤琴引領  
西巖下俄聞鐘磬音

戚韶 五首

韶字龍困松江華亭人有集

孫貞父云龍淵詩如燕趙奇士矯伉

自信又云龍淵詩奇

崛自喜終少蘊藉

詩話龍淵遠宗楊陸近學莊陳嘗遍和谷音古詩七律頗饒跌宕之趣孫少保殺齋合王鶴坡張一桂集題曰三詩翁鏤板傳之三君皆珠涇鎮人也

初夏即事

綠陰清館午風涼  
花落晴溝水亦香  
市擔鰕魚從曉賣  
鄰家櫻筍及時嘗  
筐盛雜覩縹絲急  
場撲飛蛾打麥忙

寒食過來芒種近穀芽今似韭芽長

買舟

兩兒扶醉采芙蓉驚喜扁舟落手中到處溪山堪出入  
此身天地任西東出門便覺輕千里伸脚還能睡一翁  
昨與河神澆福酒三江吹斷石尤風

自注家有奧堂

和陳簡齋清明日

虛名何苦要人知五十稱翁較未遲造物於人固多忌  
清明今日可無詩百年臣子粗安日八口妻孥向老時

筋力漸衰雙眼澀一生正坐讀書癡

春日江上

江晴燕子故飛飛江上春帆何處歸  
南浦久懷芹菜美北山初獻蕨苗肥  
心驚醉語常多悔事到中年漸覺非  
明日舞雩須一往二三童子試春衣

高閣對坐有懷鶴坡

靜裏身閒不欲眠寺西高閣寄超然  
滄波萬頃來天際白鳥雙飛去雨邊  
洗竹祠前依水檻賣魚倉口就龍船

王程消息三千里惆悵鶯花又一年

傳起巖

一首

起巖初名洪字晉卿既更名字夢求無錫人有

正峰集

京師書事次舒國裳殿撰

京國烟花重盧溝雪樹消宮陳開帝幄仙仗下簫韶御  
酒蒲萄綠官庖芍藥調天顏多喜氣報捷在今朝

鈕仲玉

三首



仲玉字貞父吳江人有五浮山人集

豐存禮云  
鳧溪格律

謹嚴神氣飄逸不為鈎棘之語

俞羨長云孫

太初一代詩豪罕有所許可獨與吾鄉鈕貞父

善時相唱和

林若撫云五浮山人詩根本性

情纏綿悠渺而秀骨獨存

朱長孺云浮溪隱

於醫其詩出入魏晉三唐衆體咸備

金孝章

云鳧溪詩鬱紆深婉雖處草莽有忠愛之思

詩話鳧溪漫豪豐存禮序之而世罕傳近其裔

孫刊五浮山人集迹其當時恒與孫太初黃勉

之酬和詩亦頗類

太初非勉之可及

## 崔二丈園亭

芳園甫營葺修竹稍陰翳村徑入沙平柴門俯江閑惠

風蕩炎氛微雨續新霽好鳥時相鳴疎花還自媚于焉  
一徜徉頗愜幽人意寧違官府期且與鄰翁醉

返照

返照吞江色歸雲護石田半含吳地曲不盡越山偏萬  
木迴元氣羣鴉接暝烟飄然陸魯望隨意汎湖船

微陰

雲氣微含雨江村小作陰烟中雙鳥沒天際一龍吟落  
日傷春事扁舟繫客心放歌巖木動隨意酒杯深

徐充 一首

充字子擴江陰人有鐵硯齋集

題扇

綠樹陰中款竹扉  
幾家臨水狎漁磯  
日長門徑無車馬  
燕子楊花自在飛

趙金 二首

金字淮獻烏程人  
布衣正德中詔徵不起有浮

休集

詩話徵士居南潯著書闢閭閻入其門者有如  
深壑恒坐小艇出入五湖陶然自酌南坦箬溪  
二尚書結峴山會造廬請入社不應也年六十  
營繭室斂平生齒牙爪髮之已脫者洗滌而囊  
盛之以為殉葬之具賦全歸詩三章其一云憶  
昔髫年時嘗記齒初齟歷歷真牙生蔬食藉以  
進邇來筋骨衰齒牙搖且振朝夕學種之種之  
惟自慎餘齡已七十疎豁落殆盡萬物有消長  
死生當委順其二云十指之爪乃筋之餘搔彼  
白首藉爾爬梳一彈指頃歲月其駛時或蛻之  
式用藏只嗟嗟此爪我心不違他日觀化亦從  
而歸其三云朝梳暮梳白髮滿首一朝禿盡真  
成老醜藏諸囊中括之無咎天地一毫惟我所  
有人言白髮公道不負我將全歸其顏何厚又  
自為生祭文輓詩自是不復出年八  
十九而卒其詩不蹈時習取境故超

過菱湖

去去餘不路遨遊一問津村孤船作市地絕水為鄰菱  
蕩官租足魚鰕野饌新衆山遙映帶相對碧嶙峋

郊居

自愛閒居卜近郊獨將心迹寄衡茅桃花水泛魚吹浪  
芹草泥香燕補巢雜植桑麻供國稅細分杞菊入山肴  
平生方外誰為友冷澹雲霞信可交

陳鑑 二首

鑑字用明海鹽人有句谿集

錢幼卿云山人詩  
鮮芳幽倩剗琢性

靈絕無浮

音滯響

西村諸社友見訪雨夜分得微字

門外泥深草路微  
滿江風雨暗斜暉  
春潮正急不可渡  
有酒相邀且莫歸  
屋帽田衣留竹桁  
茶烟藥火共柴扉  
重招更有茶蘼帖  
爛醉花前願豈違

種菜

曉日園頭抱甕頻  
滿衣寒氣露華勻  
老夫一箸非容易

為語人間食肉人

徐 鱗 三首

鱗字紹卿吳縣人有在笥集

黃清父云徐君揆藻最早享年最永

其詩貴華采尚標致經營用思愈入愈深點綴  
既成更務清朗吟諷再三真賞自得 皇甫子  
循云山人以詩名者張子言孫太初皆游大人  
以成名君獨不自造請阮窮已甚而志猶暢適  
其篇什格高調古意新句秀旨遠而辭緝聲諧  
而氣宕謂不出於孫張之右邪 劉子威云蘇  
有兩徐生昌穀氣俊而疎紹卿思新而緩  
譬諸樂或舒以促或鯨以殺各以一成  
詩話紹卿學詩於蔡孔目而標  
格矜爽所謂弟子不必不如師

謁伍相祠

湖口風色霽繁纜登雲厓迴阡度修壟肅穆趨神祠翠  
柏蔭壇宇碧草生階墀英賢去千載靈氣儼生時暉暉  
燭影耀靄靄香烟滋入郢志亮畢棲越心空疲不忘嗣  
主諫恐負先君知朝承屬餽暮見東門師空江日夜  
流忠烈何時隳至今姑胥臺空傷麋鹿馳

聞黃子得之下第

十上空垂索三春祇弊裘說難心獨苦塗遠暮何投聞



鴈書頻繫看花淚暗流誰憐一生恨頭白在皇州

甲子除夕宿魚鄉館

旅跡元無定衰情此更加飄零逢歲夜惆悵宿君家  
顰春生綠風霏雪度花故園今夕意悽斷若天涯

姜玄 二首

玄字玄仲吳江布衣有集

詩話布衣沉思韻語具襄陽孟六之體所欠筋骨

暮秋集白陽山人五湖田舍

倚檻開湖色鈎簾見浦沙晚田惟種秫春浦亦宜瓜落  
帽松風近浮觴竹日斜坐來忘出處幽意愛陶家

牧童

烟中草深黃犢肥百舌繞身原上飛斜陽幾處吹蘆笛  
頭戴衣裳渡水歸

黃嘉仁一首

嘉仁餘姚人有半山遺藁

田家

烟含暝色入村場一畝平田隅草堂急雨初收新水滿  
蕩花香雜稻花香

馬駢二首

駢字共甫江都諸生

詩話共甫為知泉州府事岱之子與兄駢次甫  
駢用甫並有詩名駢著紫泉集二十卷今失傳  
共甫撰有春秋探微十四卷吾鄉曹侍郎有其  
書而揚州新舊志均未之載也詩頗去陳言

曉行

明河欲西垂樹杪大星落隱隱遠烟消霜天一聲角

村獵

隴斷沙痕淺山空月色孤歸來夜將午射得紫顙狐

張金

四首

金字子堅江都人儒士

題丁道士小房

一徑晚來雨千巖秋正深潭空魚出藻果熟鳥窺林絕  
壑蒼烟斷迴廊敗葉侵此中堪辟穀人世信銷沉

雨中泊太倉

太倉城河潮水生石橋西下官鼓鳴客子思家孤夢遠  
舟人刺船雙櫓輕橫風倒海浪作勢急雨過山雲不行  
暫時繫纜小港口城門擊柝聞初更

寓嶽祠

尋常不到山前路洞口閒雲盡日封時有聽經童子至  
不知身是石潭龍

泊金閭

金閭門下燈火明吳姬水調歌入城曲終夜靜不知處

涼月滿船春水生

吳夔

一首

夔字舜南高郵州人諸生

山居即事

颯颯樹頭風山犬吠不已呼童啟柴扉明月照谿水

蔡圻

一首

圻字子封江都人儒士

雨後即事

亂流東下晚霞生  
破屋西邊落日明  
卷盡墨雲山雨歇  
出門扶杖看天晴

陳瀛一首

瀛字古厓海鹽人國子監生選授宛平主簿

石林山房

輕風落樹散林烟  
海日三竿正熟眠  
傍午起來花落盡  
不知雷雨過山田

顧文淵一首

文淵字靜卿仁和諸生有滄江集

晚發錢唐

潮平小櫂發錢唐  
俄頃帆飛過富陽  
兩岸好山看不盡  
數聲漁笛起滄浪

楊學禮一首

學禮號東濱上海諸生

春興

菖蒲枸杞滿庭栽  
書閣垂簾半掩開  
蛺蝶不嫌春色澹



隔牆飛去又飛來

陳籥 三首

籥字德音閩縣人有竹居集

送辰翁還閩

飄零同楚越此別各風烟  
後會知何日相思動隔年  
孤燈雙淚盡萬里一帆懸  
誰見家園好椒花勝裏傳

寄訊

春風轉憶別衡廬淮水茫茫  
老客居却被故園兒女笑

至今猶作未歸書

除夕感懷

椒觴兩見客中傳  
簫鼓喧喧暗自憐  
縱使明朝得歸去  
今宵還說是明年

朱應辰

一首

應辰字拱之一字振之寶應人應登第貢士

東湖曲

曲岸香風起汀洲采白蘋  
鴛鴦浮綠水偷眼蕩舟人

陳宇 二首

宇字時清寧德人有五真集

宜春舟次

客塗寂寞晚風寒  
舟次宜春近石灘  
苦竹叢深山鷗雨  
令人却憶鄭都官

園居

無事柴扉盡日間  
嬾情幽興每相關  
却嫌新筍都成竹  
遮過門前一半山

嚴時泰一首

時泰餘姚人官福建鹽運司同知有牢盆集

詩話山陰陳起侯撰浙士登科考於弘治辛酉  
載湖廣中式一人嚴時泰注云辛未三甲按辛  
未登第者乃江夏人晚以右副都御史巡撫四  
川陞工部右侍郎致仕揚用修贈詩所云昂昂  
嚴夫子矯矯人中龍長才抱經濟大雅含春容  
叩之清廟絕朱瑟縣之東序鏗金鑪者是其人  
也若餘姚嚴時泰祇官福建鹽運司同知故其詩  
名牢盆集集中有云憶我東南來於時歲方晏  
又云暮叩西禪寺又云頗為微官縛皆在閩中  
所賦然則用修贈詩別是一人黃梨洲徵君輯  
姚江逸詩誤運同即侍郎未免為起侯所惑矣

出城尋山

雅負山澤情平明出游行崎嶇既經丘峻絕還陟巖征  
衫清露濡垂蘿或相罨縈紆度林涇草樹益蔥蒨古洞  
闌無人聊以憩吾倦幽鳥遺好音起覓不可見含情倚  
嘉樹日暮增繾綣憶我東南來於時歲方晏春徂忽已  
夏逝景迅流電不樂復如何嗟爾玄髮變

王瀛

一首

瀛字元溟會稽人有西湖冶興

韜光菴

吟邊喜與故人登老樹無枝石有稜坐久江潮聽漸近  
寒山高出白雲層

明詩綜卷四十三

總校官庶吉士 臣張能照

校對官檢討 臣盧應

膳錄監生 臣閔思紀



欽定四庫全書薈要

集部

明詩綜卷四十五

詳校官編修臣汪鏞



欽定四庫全書薈要卷二萬五百十七

集部

明詩綜卷四十四

翰林院檢討朱彝尊編

涑一首

涑字維東慈谿人嘉靖癸未賜進士第一歷官

翰林院侍講學士有明山存橐

靜志居詩話文徵仲待詔翰林相傳為學士及  
楊方城所窘昌言於衆曰吾衙門非畫院乃容  
畫匠處此何元朗叢說述之而曰二人只會中  
狀元更無餘物衡山長在天地間今世豈更有



道著姚洙楊維聰者邪聞者以為快心之論然  
學士嘗與孫太初薛君采高子業相唱和且聞  
山東李中麓富於藏書特遣其子就學即徵仲  
去官日躬送至張家灣賦十詩送別比之巍巍  
嵩華至其贈行序略云自唐承隋敝設科第以  
籠天下士爵祿予奪足以低昂其人於是天下  
風靡士無可稱之節者幾八百餘年然猶幸而  
有獨行之士時出其間以抗於世而天下之人  
亦罔不高之求之唐則元魯山於宋得孫明復  
二子豈有高第顯位為可誇哉徒以其矯世不  
涅之操好古自信之志足以風勵天下而一時  
名流皆樂為之稱譽焉耳今之世如二子者誠  
難其人吾於衡山先生竊以二子比之而衡山  
之所造則又有出於二子之所未純者先生明  
經術以為根本采詩賦以為英華秉道誼以為  
壇宇立風節以為藩垣蓋嘗聞之却吏民之賻

以崇孝也。庶寧藩之聘，以保忠也。絕猗頓之游，以勵廉也。謝金張之饋，以敦介也。不懼於台鼎之議，以遂其剛毅也。不思於輜藝之招，以植其堅貞也。此數者，足以當君子之論。而先生未始以為異也。聲震江表，流聞於天子之庭。先生亦烏得而逃哉。曩者先生之貢於春官也，朝廷錄其賢拔而官之。翰苑儒者共指以為榮，而先生不色喜。官僅三載，年僅五十餘。先生遽以南歸為念。吾每謬言留之，而先生持益堅。三疏乞歸，竟得請以去。先生其有悟於達人之指邪。嗟夫！先生嘗試於鄉矣，有司以失先生為恥。而先生之名益高，嘗官於朝矣，銓曹以不能留先生為恨。而先生之節益重，榮出於科目之外，貴加乎爵祿之上。爵羅之所不能取，紮維之所不能縻，樊籠之所不能收，彈射之所不能驚，翩然高翔如鳳皇之過，疏園飲湍瀨，回蒙汜，下視泰山之

鴟啄腐鼠以相嚇者何不侔之甚也傳所謂難進而易退易祿而難畜者其先生之徒與自大道既漓好惡立於一鄉而不可達於天下之廣毀譽徇於一時而不可合於萬世之公故吾之論先生直以魯山明復為喻而使世之觀先生者不當以三吳之士求之也繹其詞傾倒為何如者而謂學士有是言邪金華吳少君詩說謊定推何太史然則元朗乃好為誑語者選家信何氏之說遂不錄學士詩未免偏於聽矣

秋夜偶成

新涼沁苧衣  
楚客悲遲暮  
林葉墮寒颼  
皋禽警清露  
銀河沒半空  
秋影在高樹  
何處洞簫聲  
吹徧江南路

徐

階 十三首

階字子升松江華亭人嘉靖癸未賜進士第三  
授翰林編修抗疏論孔子廟制斥為延平府推  
官稍遷浙江江西提學副使入為司經局洗馬  
歷升禮部尚書入直無逸殿尋入東閣辦事累  
官少師吏部尚書建極殿大學士卒贈太師謚

文貞有少湖集

陳卧子云徐公經世之士其詩不專臺閣

詩話先祖妣徐安人為文貞公曾孫余少日登  
世經堂觀永陵手勅羅列梁棟間蓋得君久而

不衰罕有過焉者當日表懋中於西內撰青詞  
湛元明為鈴山作詩序貽笑士林而公不露所  
長讀少湖文集有醇無  
疵非諸公所易幾矣

感興

烈風振黃塵長夜何颼颼浮雲東南來各有雨雪謀美  
人金玉姿竚竚倚高樓寶玦雙明珠欲致道阻修嚴霜  
痺百草荏苒歲已邁寒暑互代謝日月無停輶至理諒  
斯存耿耿生百憂冥冥雙飛鴻可望不可求

贈傳神蕭鴻臚

蕭君七年別來自江西渚以彼絕妙手寫我羸頽肌揮  
毫捷風雨初不經意為須臾兩徐生竝出當前楮兒童  
走相問何以更有茲我笑不為言視久竊自悲容顏醜  
如此已見猶惡之苟觀盡才俊何由使愉怡請君為潤  
色稍就娥媚姿君怒不復磨我亦慚無辭誓終抱此醜  
亟訂漁樵期

送考功朋石楊君赴留都

昔人賤榮達今人慕通顯所履非有殊中得異深淺欣



戚緣感生塵幻非實踐望賒情日悲理會境俱遣子年  
二十強才器重瑚璉春明去不顧此意昔所鮮因之內  
自媿孱鈍玷華選會當理歸楫長嘯謝軒冕

送司封仲芳楊子赴留都

哲人重道義朝貴不足縻丈夫志四方遠適非所悲如  
何與子別悵悵不忍辭古道日淪替羣諛紛追隨子獨  
諒迂僻經訓相劇規去住忽以異麗澤安所資頽波無  
停流靈曜亦西馳感此重念子何以慰爾知至理不外

得吾心實吾師願言勵操存千里同襟期

送沈進士子善尹鄱陽

治民如烹鮮此語傳自昔邇來才俊士古訓恥誦習譁  
然煩其令藉口興與革遂令田野間奔走廢耕織朝廷  
念元元置吏務安輯豈意更勞擾肥身重民瘠沈生起  
巍科探討遍六籍况復有家教茲義諒能識鄱陽號樂  
土近稍異往日撫摩還富厚夙夜在努力高才如騏驎  
千里初發迹康莊與曲徑慎哉審所適

送趙甥赴衛輝幕

汝母子之姊六年長於子子昔生十齡夜燭誦詩書汝  
母執女紅竟夕與子俱茲事四十年想像昨日如頭顱  
各已白相望天一隅每懷骨肉情中宵起嗟吁春來獲  
見汝差足慰煩紆汝今幸有官汝母當怡愉汝本故家  
子書香襲巾裾子衰媿忝竊早晚賦歸歟汝宜兩念此  
奉法保民譽祿養儻能久庶報生汝劬舅甥共休戚贈  
言不以諛勗哉萬里程夙夜慎所趨

送王國完東歸

春色千門柳歸航兩月塗歲更鄉夢切客去草堂孤會  
合期猶阻翻飛意不無瑁湖煩問訊松菊恐荒蕪

送曹一坡判辰州

衡嶽已無鴈辰陽吁可知未愁會面阻豫計得書遲屯  
戍煩兵力流亡苦歲饑若為宣帝澤遠慰故人期

瓜洲風雨不克渡江

未遂歸來願空驚歲月奔布帆三日雨茅屋數家村山

氣遙連海江聲近到門無緣得飛渡東望欲消魂

送顧起元甥壻之京

病中愁送客況復是殘年雨雪三更夢江湖萬里船天  
垂龍塞沒星接鳳城懸到得燕山路應書數字傳

廣信阻雨有懷子明弟

山國夜多雨冥冥氣不分石田寒貯水松逕濕蒸雲灑  
密愁仍見聲微醒故聞西堂何處所知共惜離羣

分水關

峻嶺開閩服重關限楚氛星隨分野異地漸燠涼分人  
語聽難辨山名得未聞所嗟南逝水不似北歸雲

橫溪為彭允禎賦

橫溪東去水迢迢虛閣重簷共寂寥山外夕陽低度鳥  
雨餘春渚暗通潮寒空落葉書聲靜秋草孤帆客夢遙  
欲徙西湖湖上石為君秉月更吹簫

潘恩四首

恩字子仁上海人嘉靖癸未進士累官南京工

部尚書改都察院左都御史卒贈太子少保謚

恭定有笠江集

張惟靜云子仁詩型範自然體裁各適已深入作者堂奧

徐

伯臣云笠江詩祖盛唐充然自得

王

元美云公詩根柢鄴中間及開元大歷

詩話先大母徐安人為恭定公女孫所出予七齡時塾師課以屬對不協安人述舊事謂公六歲能調四聲因以公所訂詩韻輯略授予自是知別四聲矣公詩凡風雅什樂府五言雜體靡不擬又與高子業田叔禾相酬和知其用力深而取友之善也

### 塘上行

綠蒲生中池其葉何蒙茸與君締昏媾焉知鮮有終三

月楊柳花飛泊隨春風入治化為萍吁嗟無定蹤衝波  
一相激葉葉自西東我心元不移君情忍中絕妾生禽  
不如鴛鴦故成列妾生草不如絲蘿可高揭妾生木不  
如連理枝糾結越鳥豈北翥吳江不西旋妾生一以棄  
苦相誠可憐恨無奮飛翼委志畢君前

從庾嶺北歸至萬安縣舟中作

嗟余謬時網作吏入西粵飽歷五嶺雲四見梅花發草  
樹冬常青嵐霧晝不歇狗祿歎迷方留滯漸英達駕言



適京師歸途嶺初越忽驚險阻盡俯視原隰闊白沙綴  
疎星碧水澹華月乘流耳目新破浪精神豁鷗鳥會我  
衷飛鳴恣怡悅雖牽行役悲吾躬庶可閱

當陽晚行

山行日有程中路速修軫牛羊夕下來嶺日忽以盡石  
滑露華零木號風力緊野燒漸已微疎星忽而隱倦翮  
怯途遙迷方憐步窘僕御慘不歡勞生况多疾撫時百  
慮煎于役良足憫惜哉紱冕牽久負沮溺哂

湖上

西湖如練風日清西山屏障更分明上方金碧自相映  
下界鼓鐘時一鳴槐柳青溪張席罷菰蒲白水放舟行  
此時政切東南想怪爾浮雲空北征

鄭曉一首

曉字室甫海鹽人嘉靖癸未進士累官南京吏  
部尚書尋以右都御史協理戎政改刑部尚書  
卒贈太子少保謚端簡有集

詩話端簡公家法甚嚴遺訓子孫倡優不許入  
門違者以不孝論屏諸宗譜之外築別業於城  
東北隅穿池中央四面種蔬藥賓客至者燕於  
池上百可亭亭陰有牡丹數本嘗與夫人玩花  
豚一蹄魚一尾雞子四枚酒三行而已嗣先妣  
孺人為公來孫子嘗讀書其地芋魁芥孫豆棚  
瓜堰恍若深村今已屬之他姓矣公銳意經史  
學韻語不多作然曾刊鳴唐萬選絕句以行非  
不留心  
風雅也

# 彭城

彭城天下險萬里接河源落石東南斷飛濤日夜喧江  
淮連絕島齊魯入平原寄語當關者征求無太繁

張時徹

七首

時徹字唯靜鄞縣人嘉靖癸未進士授兵部主事改禮部出為江西提學副使歷福建參政雲

南按察使山東右布政使河南左布政使以僉

都御史撫四川再撫江西遷南京刑部侍郎改

兵部進尚書有芝園集

楊用修云芝園匠意鑄詞色具體備江于順

云唯靜立格漢魏取材六朝而音節變調出入開寶之間情屬景生神在象外陳卧子云司

馬樂府頗有造構近體宛情

麗逸如層臺佚女意帶雲霞

詩話芝園樂府不規摹古人較之濟南覺勝  
五律頗近初唐七律潦倒麗疎無譏焉已

彭彭者車五章

彭彭者車于彼河洲有美丹漆不以飾輶彼君子兮使  
我心憂一彭彭者車于彼河側矯矯騏驎不以服輶彼  
君子兮使我心惻二爾之弦矣衆維韋矣爾之石矣衆  
維脂矣匪爾圖之狂維衆之迷矣三矢之既釋不可反  
也錦之既張不可卷也我生有定終不可轉也四修爾  
疆畎藝爾黍稷保艾爾生夙夜無斁如彼見龍時哉斯

匪五

秋胡行

衆鳥有匹胥遨以遊摯而有別實惟睢鳩彼誰者子矯  
矯卿侯突而好我中心孔羞卿有婦兮妾有夫悅彼姝  
兮曾睢鳩之不如兮

一解

倉庚喈喈春日載陽執我懿

筐采彼柔桑彼誰者子車馬龍驤含情流睇黃金是將  
獸有穴兮鳥有林卿有金兮不如我有心兮

二解

明明

日月照臨下土女子有行畏彼多露彼誰者子繡衣朱

輅美也可悅不念其故山有木兮水有魚子不信兮孰  
可與同居兮 三解

北征雜詠 二首

養鳥莫養鸞藝麻莫藝蘭芳香難為用過美多憂患田  
甲賤死灰白日摧冰山時運有來去禍福無定端周道  
蕩如砥朱門競彈冠咳唾生風波誅奪在一言日月不  
常盈人生豈得安栖栖巖穴士無為恥泥蟠

義和無停軌寒暑更相易歲暮誰不歸獨為遠行客荆

榛當路衢烏鳶翔我側疾風吹沙塵白日忽以匿筋骨  
既憔悴感此增怵惕悠悠赴壑鱗戢戢歸林翼物性有  
如此行役不遑息閭閻不可攀閭風不可即果腹適莽  
蒼浩蕩將安極

### 長安道

月曉

一作曙動

開長樂風清

一作鶯啼

遶建章龍媒馳道出鳳吹

彩旌揚繡陌生朱霧銅溝映綠楊渭橋春水漲日日浴  
鴛鴦



齋居

紫闕風雲迴彤庭日月臨  
明禋昭代典肅戒小臣心  
雨露春偏渥星河夜不沉  
長安千萬里應獻太平吟

閭閻曲

穀熟不到釜絲成不上身  
莫道江南樂江南愁殺人

歐陽德一首

德字崇一泰和人嘉靖癸未進士累官禮部尚書  
贈太子少保謚文莊有南野集

送胡九峰改太常少卿北上

丹楓江上路送爾倍沉吟  
南北如相避誰從話此心  
漸鴻遵月渚倦鳥怯雲岑  
孤負溪山約臨風撫素琴

馬 坤一首

坤字順卿揚州通州人  
嘉靖癸未進士累官工  
部尚書有石渚集

苦雨

南國春來不肯晴  
陰雲接地暗山城  
翻風何事鶴一作

雙下喚雨忽聞鳩一鳴處處蠶飢吳地妾牀牀屋漏杜陵生鶯花三月空無賴獨掩柴門對短檠

朱廷立一首

廷立字子禮通山人嘉靖癸未進士除知諸暨縣入為監察御史升南太僕少卿終禮部右侍郎有兩厓集

杜宇

愁烟積雨過芳辰乍喜濃陰綠樹新杜宇多情啼不歇

山中可有未歸人

吳鵬 五首

鵬字萬里秀水人嘉靖癸未進士累官吏部尚書加太子太保有飛鴻亭集

詩話尚書居里門不自韜晦以是鄉人皆惡之  
會有詔許佃浮屠廢寺為民居公子繼輸直於  
官請佃枋嚴寺隙地且酬僧徒以白金四百兩  
因葺野樂園蓋與勢佔者稍有別矣園有堂曰  
先瀛前為圓曰閒閒曰猗猗曰忘機曰都春門  
曰吾如所堂後有樓曰雲日樓前亭二曰漱芳  
曰臨賦小治環之左右齋各一曰悟真曰守虛  
園成尚書自為作記告誠其子謂宮室勿崇土

田勿闢與馬勿飾服御勿奢褻餼勿珍執業勿  
懈交游勿濫鄉鄰勿競施予勿吝辭受勿苟觀  
其出言也善方諸席寵滅義以惡終者亦有間  
也尚書詩文頗條暢特少警策當在徐沛拯民  
之饑哉漕糗數萬發之而後請命又敗永城賊  
師詔於五河膽略有過人者比於吳之陸完差  
可恕  
爾

潞河發舟

解纜催笳鼓青春萬里行  
煙籠堤柳密水泛野鳬輕  
獨立思王事無才補聖明  
此心懷魏闕惆悵擢歌聲

永平道中

疎雨未滑道秋風隨使輶磴危頻下馬溪斷不逢橋板  
屋居何陋蒲蠶習更驕暝投孤館宿寂寞聽鄰簫

夫椒山

夫椒山前孤草亭天風颭颭秋冥冥客來獨寫忽飛去  
七十二峰湖上青

舟行雜詠 二首

山花瑣細簇郵亭小艇漁歸水氣腥一路東風嘶去馬  
土牆斜颭酒旗青

驛亭素壁上苔痕亭下奔流淨不渾慣是秋河愁汎濫  
漁家偏占白鷗村

屠大山 二首

大山字國望鄞縣人嘉靖癸未進士累官兵部  
左侍郎巡撫應天與倭戰失利被逮繫獄既而

釋歸有集

屠長卿云公歸田後與里中故人縱  
飲酒酣援筆作歌了不求工而往往

神來非詞人  
嘔心所得

雜詠

古道有蒺藜行者戒經過新徑富桃李過客肩相摩古道日以微新徑日以多江河逝悠悠歎息將如何

聞道

聞道黃河套年來勢不同驚塵昏陝右邏騎薄遼東五月金符動三軍鐵馬雄何當清絕域再見幕南空

李仁一首

仁字元夫東阿人嘉靖癸未進士累官右副都

御史有吾西遺橐

朱中立云吾西清婉和粹有中唐餘韻



茂欽至得德兆起居

不見黃生久天涯  
怨索居椒蘭懷楚客  
冰雪斷江魚白  
日登山屐青春負郭廬  
虞卿能發憤會見早成書

李宗樞一首

宗樞字子西富平人嘉靖癸未進士除諸城知縣徵拜監察御史出為河南僉事歷僉都御史撫河南

度居庸關

峻壁含雲迴飛湍接澗迴虛聞三峽險疑是五丁開荒  
樹分天宇驚沙暗戍臺祇慚持節度豈是棄繻來

劉隅一首

隅字叔正東阿人嘉靖癸未進士授福建道御  
史出為四川按察僉事坐謫稍遷永平知府升  
河南副使進按察使以右僉都御史巡撫保定  
終右副都御史有範東集

朱中立云範東意氣  
安閒辭旨沉快有杜

陵遺  
意

過宿州

憶昔乘輶過霜飛楚甸清十年頻去國此日重含情浦  
樹浮烟遠河流入海平山川望不極春草徧王程

一作伴孤

征

李舜臣 二首

舜臣字懋欽一字夢虞樂安人嘉靖癸未會試  
第一由戶部主事改吏部歷考功員外郎出為  
江西提學僉事改南國子司業轉尚寶卿久之

召為太僕卿有愚谷集

孔汝錫云愚谷詩優柔涵泳粹然一出於正

詩話李獻吉有九子詩李伯華仿之亦作九子詩以懋欽為首次以劉子素又次羅達夫餘則呂山甫熊叔仁唐應德趙景仁王道思潘子抑也子抑名高太原人王恭襄瓊女壻中嘉靖壬辰進士以翰林編修建言罷官伯華詩所云貴人懷私憤假公得一逞也又詩云潘君氣最豪權貴等鴻毛身廢談邊務家貧賣寶刀又云有書過千卷有田不一頃亦一負奇之士所著春谷集不傳李伯華輯明雋僅錄其一詩而已近見晉人編仕國人文竟不及其姓氏惜夫

初度友人過飲

乍喜高軒過還驚短髻催相看俱老大相慰是歸來濁

酒家能釀黃花手自栽今宵踏明月莫惜醉中回

徐錦衣西園

暖日紅芳樹晴烟碧小溪春風二三月定有好禽啼

陸銓

五首

銓字選之鄞縣人嘉靖癸未進士除刑部主事  
諫大禮廷杖遷兵部員外轉禮部郎中為張孚  
敬所忌出為福建按察副使歷廣西按察使廣  
東布政使有石谿集

詩話石谿論詩專以性情為主嘗曰宋人不能  
為唐唐人不能為漢魏時為之也其偶似者宋  
之似唐唐之似漢魏爾故諸體不沿時習五言  
如鳥白雲中樹山青雨後峰亂帆爭入浦羸馬  
怯過橋越竹成游輪吳蠶吐釣絲七言如山田  
雨足秋仍熟石室風高夏亦寒絕壁有松人不  
到深林無主鳥相忘沙頭水急潮初落山腹烟  
多雨未收野樹巢空驚鴈去淺沙船動覺潮來  
輕便度嶺雙肩輪小巧穿橋獨櫂舟一別動經  
千里間百年消得幾回忙皆非陳言也至若獄  
中次季舉之韻云聖怒不妨為孝子狂  
言豈敢托忠臣庶幾哉忠厚之遺矣

## 民謠

毀我十家廬構爾一郵亭奪我十家產築爾一佳城官

長尚為役我曲何時直本是太平民今願逐逋客

撥悶

修塗密春雨新水浮磽田灘聲起林杪浦色迷遠天溯  
游違水性力挽苦不前歸情逐飛鳥度日長如年前村  
靄雲樹望久生夕烟來船翼雙櫓疾若矢發弦勞逸迴  
倍屣遲速殊相懸事以乘機易力因失勢捐引觸悟至  
理何獨舟行然

湘湖與陳見吾同遊

陳侯慷慨作賦才置酒攜我湘湖隈湘湖去縣十二里  
津吏伐鼓廚船開須臾山曠湖風發船頭噴浪聲如雷  
酒酣日落鳬鷺亂振衣倚櫂登荒臺人言夫差昔困越  
直待烏喙行成迴至今山腳號排馬天風颯颯吹枯荻  
十年轉盼似昨日敗軍勝將同灰埃陳侯陳侯歸去來  
登舟長嘯且銜杯眼前功名亦吳越吳越于我何有哉  
再和宣明館陽明先生韻

五色晴江雨後痕亂峰雲氣月華渾邊陲萬里還通驛



盛世深山亦有村興至欲穿雙屐去愁來只對一燈昏  
夜郎詩思知多少恐有當年遷客魂

清明

清明日薄晝陰陰籬外新秧短似鍼縛草象人田畔立  
借他風力逐飛禽

顧夢圭

五首

夢圭字武祥崑山人嘉靖癸未進士累官江西  
右布政使有疣贅集

詩話武祥清約自居有同寒素當參議粵藩賦  
詩云夏月行部至雷州思製一葛且復休冬月  
行部至廉州思製一裘且復休故衣雖穿尚可  
補秋毫授民民亦苦胡威之清何以過此呂仲  
木擬梅花贈之曰武祥如  
此花矣聞者以為美譚

## 擬古

雖雖雲中鴈八月徂南方念彼北風來但馬懷稻粱九  
月氣已淒十月繁冰霜生成一作來毛羽單高飛不成行  
君門有鍾鼓聽之徒自傷

## 潮縣行

入城半里無人語枯木寒鴉幾茅宇蕭蕭酒肆誰當壚  
武清西來斷行旅縣令老羸猶出迎頭上烏紗半塵土  
問之不荅攢雙眉但訴公私苦復苦雨雹飛蝗兩傷稼  
春來況遭連月雨縣城之西多草場中官放馬來旁午  
中官占田動阡陌不出官租地無主縣中里甲死誅求  
請看荒墳遍村塢

珠池歎

并序

廉州平江青鸞楊梅池雷州樂民池產珠地也

先朝率十五六年或十年一採始得美珠上供  
邇者三年再採珠已竭矣所得皆碎小藩臬有  
司並受詰責不知此物生息甚難取之太頻安  
得圓美每採費舟筏兵夫以萬計頑悍之民因  
緣為盜今雷廉凋敝已極採取不止將有他虞  
余承乏攝此事儻議復採當疏聞聖明必不以  
無益害有益也

漢家嬪嬙無麗飾南海逍遙養泉客昭陽新寵關新妝

照乘之珠苦難得孟嘗美政龔黃班今人反怨珠來還  
璽書三年兩頒降驪龍赤蚌皆愁顏徃時中官涖合浦  
巧徵橫索如豺虎中官去後璽書來誰訴邊陲無限苦  
野老村童不著禪四山戎馬夜紛紛竹房無瓦餅無粟  
猶折山花迓使君

感事

畫戟門前車馬稀東市灑血沾朝衣中台轉盼無光輝  
華亭唳鶴聲咽月中空喚行人歸

謁康陵

早霧籠山暝新松匝殿稠三邊餘武烈八駿想神遊  
花萼皇情遠衣冠歲事修傷心大官酒猶得獻千秋

高叔嗣 二十二首

叔嗣字子業祥符人嘉靖癸未進士授工部主  
事改吏部歷員外郎中出為山西參政終湖廣

按察使有蘇門集

廖鳴吾云詩人有事於楚者若邊廷實之冲澹徐昌穀之

超逸李川父之脫灑高子業之奔放咸足被之廣奏登之升歌洋洋乎其盈耳也哉陳約之

云子業謝絕品流因心師古每有屬綴佇興而  
就寧復罷閣不為淺易往往直舉胸臆刮抉浮  
華存之隱冥獨妙閒曠有蘇州之冲澹兼曲江  
之沉雅體王孟之清適具高岑之悲壯詞質而  
腴興近而遠洋洋乎斯可謂之詩也已蔡子  
木云蘇門詩在我朝當屬第一李伯華云何  
李雖是大家去唐却遠蘇門雖云小就去唐却  
近蔡白石王巖潭以為國朝第一其言雖過要  
之不可盡非也王元美云高子業如高山鼓  
琴沉思忽往木葉盡脫石氣自青又如衛司馬  
言愁憔悴婉篤令人心折又云高子業空谷之  
幽蘭崇庭之鼎彝也又云刻羽雕葉舍陳而新  
吾推子業然不能諱其促王敬美云詩有必  
不能廢者雖衆體未備而獨擅一家之長如孟  
浩然洮洮易盡止以五言雋永千載並稱王孟  
我明其徐昌穀高子業乎二君詩有不同而皆

巧於用短徐以高韻勝有蟬蛻軒舉之風高以  
深情勝有秋閨愁婦之態更千百年李何有時  
廢興二君必無絕響 吳明卿云獻吉仲默並  
策上駟而馳中原子業雖駮駕第緩轡後至耳  
劉仞叔云蘇門思悟入玄詩在晉魏初唐之  
間 顧玄言云叅政詩若磊磊喬松凌風迴秀  
響振巖谷 胡元瑞云高子業視李何後出而  
其五言之工不欲作令人一字在唐不減張曲  
江韋蘇州矣又云弘正五言律自李何外如薛  
君采之瀟灑溫醇高子業之精深華妙置之唐  
人毫無媿色然二君俱不能為七律高蓋氣局  
所限薛由工力未加 黃清甫云高詩綽有意  
見不假緣飾吐言成章誦之若落落直致而中  
自豐腴 馬仲良云羊孚有言資清以化乘氣  
以霏遇象能鮮即潔成輝四語可畫一子業也  
范介孺云子業多艱連之致惜未免其詣



陳卧子云子業沉婉雋永多獨至之言讀之如  
食諫果味不驟得又云子業詞存清曠意成淒  
楚李舒章云子業如  
疎林清磬聽者振衣

詩話嘉靖初後生英俊稍稍厭棄李何子業以  
吏部郎謝病歸時獻吉留開封辭必摹古子業  
自序讀書園彙謂本非所長而強力慕之度必  
取調於衆其立意固殊讀其詩如食袁家饅止  
渴雖爽而不伐性如以水精鹽進酒雖薄亦能  
醉人李中麓六十子詩於子業有云蘇門能入  
室何李只升堂  
其傾倒也如此

古謠

荆和當路泣良璞為誰明茫然大楚國白日失兼城燕

石十鰲重魚目一笑輕古來共感歎今予益吞聲

再調考功作

引疾三上書微願不克諧徙官復在茲心迹一何乖  
軒裳日待旦閭闔凌雲排入屬金馬籍出與羣龍偕積賤  
詎有基履榮誠無階但惜平生節逾久浸沉埋既妨來  
者塗誰明去矣懷鳥迷思故林水落存舊涯唯當尋素

業歸卧守荆柴

益藩湖南云委  
婉非俗客能道

秋情

涼風吹庭樹蕭然已暮秋  
歲運空云往客行胡久留  
良時每易失微志果難求  
餘光僅可積但空成山丘

病起偶題

空齋晨起坐歡遊  
罷不適微雨東方來  
陰雷倏終夕久卧不知春  
茫然怨行役故園芳草色  
惆悵今如積

雨中簡子仁員外

積雨曠朝暮層城苦沉沉  
端居誰與言抱此懷人心  
一為軒冕拘遂使名跡侵  
長媿元豹姿隱霧南山岑  
君通

微妙理佇想開塵襟

簡袁永之獄中

本同江海人俱為軒冕誤子抱無妄憂余有多言懼昔  
來始青陽今此已白露豈乏速進階苟得非余慕罪至  
欲何言直以愚慵故衆女競中閨獨退反成怒追誦古  
時人蒙冤誰能愬皇心肯照微與子齊歸路

元日同谷子延賦

雄都盛賓客車馬爭馳騫芳辰啟初年宴飲多所務不

知灌園身何為迷方誤郊館抗空壑山扉啓峻路良朋  
平生歡就我今朝步城因並舍登徑為穿林度微陰原  
上明片日雲中霧青霞照深池白雪停幽樹共貪歲欲  
新不厭日旋莫農田方在茲君豈數能顧

益王潢南云  
造語精綺

叙懷

生長夷門郭往來莘野路家貧無良謀躬耕有遠慕始  
窮伯王略遂覽生民故曰余本空疎當年志高步慶彼  
鳴鶴期忝此飛龍顧亦知敝帚材早享千金誤日月不

我留撫心慙往素

益王潢南云  
辭意俱古

移樹道上

春園就蕪穢雜樹生  
蒙密不知雨露功  
長養何多術  
婆娑使人憐  
斬伐終余恤  
乘時聊徙植  
予以託吾室  
交生兩相當  
列映直如一  
轉令門巷新  
遂放雞豚出  
修修原上風  
團團村邊日  
紛吾本蹇劣  
兼爾抱憂疾  
敢學成都桑  
而謀荊州  
橘願及垂陰  
成初志  
儻此畢

歸次南關驛

祇役忽于今徑塗宛如昨秣馬息荒林振車越重壑歲  
暮滯還期客心悵不樂曰予本沉冥遭時乃獲落化海  
異微禽蟠泥豈尺蠖方因遷斥餘始遂歸來諾逝將入  
雲峰滅迹從所託

送別德兆武選放歸

燕郊秋已甚木葉亂紛紛失路還為客他鄉獨送君罷  
歸時共惜棄置古常聞莫作空山卧令人望白雲

春夕同李考功道舊

下馬春庭夕明燈夜雨深人多新歲感日有故園心磨  
減名題柱淒涼賦賣金十年同省舊誰念各如今

賦得嶧山碑送李東升明府

秦皇千載後嶧嶺尚遺碑斷石青山路孤城滄海濤蕭  
條餘霸氣磨滅想雄辭君到鳴琴暇應多弔古思

得張子家書

晚日照餘晴荒亭暗復明歸雲度深樹飛雨過高城蹇  
劣慚當代棲遲笑此生空持一書札長歎故人情



雨後有懷子延

驟雨新秋晚微晴墟落間悠然抱藜杖率爾倚柴關空  
壑纔容水流雲故滿山遙知城市裏應羨此身閒

西園再酬谷子延

茅屋還相見冬郊那可聞荒城連凍浦落照與寒雲遠  
樹行時倚歸塗到處分留君終日語猶自日思君

武城漕河逢張使君憶考功舊寮

岸圻留餘照舟行稱晚風歸心千里倦行役一時同置

酒滄波上停橈綠樹中思君如河水何日不朝東

送別蕭司勳

柴門夜語罷惆悵出前林曉日孤村映秋風落木深別  
來生白髮歸去換愁心還復茅檐下朝朝鳥雀吟

井陘道中

曉霜塗屋重寒日出林微改轍辭邊徼登車望帝畿深  
山藏驛道巨壑斷村扉欲問前征侶迷津何處歸

晚趨忻口

雲峰聊極目立馬獨愁心豈直關山遠其如雨雪深笳聲先入夜邊氣迴生陰疇昔長征意蹉跎力不禁

沁州張源鋪

去國三年意還家此日心天寒客路永日暮衆山深沙塞人偏老風霜馬不禁如何更萬里投跡楚江陰

送管平田先生頒封秦府歸省

五等周分國三王漢世家日聞敷帝族時見遣皇華剪土仍鶉首疏邦自犬牙秦關通使節灞水渡征車過邑

恩難屢登堂禮更嘉何如北山客行役動長嗟

葉

份一首

份字原學婺源人嘉靖癸未進士歷官山東提

學副使有蓮峰集

汪禹乂云原學詩  
平妥中有逸思

夜泊壽春驛

萬里愁行客孤槎自使星人烟昏晚渡漁火亂風汀  
柏長淮水松杉古驛亭誰家吹短笛淒斷不堪聽

周易一首

易字時伯蕪湖人嘉靖癸未進士歷官提學副使有赤山集

春眺兼簡楊石巖

野曠春猶淺山明雪正殘  
楚雲棲樹濕淮雨過江寒  
酒醒頻看劍愁深獨倚闌  
客從天上至猶道未回鑾

陸冕二首

冕字宗周崑山人嘉靖癸未進士除禮部主事

歷官陝西按察副使

周子願云宗周律已廉介詩雅健清古

西夏曲 二首

秦關百二古稱雄  
寧夏山河襟帶同  
天險皇圖元自固  
從前失策自和戎

校獵河西日未曛  
擬金伐鼓動風雲  
還軍飲馬長城窟  
野馬黃羊各百羣

韋商臣 一首

商臣字希尹長興人  
嘉靖癸未進士除大理評  
事疏救議禮諸臣  
廷杖謫靖江縣丞累遷四川

參議有南苔集

詩話南苔世為廉吏時以比胡威父子歸田後  
與蔣恭靖瑤劉清惠麟孫僉事濟蔡同知玘唐  
主事樞陳參政良謨顧尚書應祥吳太僕龍朱  
太守懷幹張通政宸施知州佑李知縣丙吳副  
使麟參政龍一十五人結峴山逸老之社雖饒  
饒不給而春秋必赴能不改其樂云父厚字原  
載中成化丁未進士仕至黃州同知有翠屏詩  
集不傳雲峰者名雲鳳烏程人官刑部主事蓋  
續八逸  
老社者

秋社和朱雲峰韻

近圃青千疊遙山碧四圍舟從天際至觴向雨中飛殘

暑蒲葵扇新涼薜荔衣更憐天欲霽返照弄餘暉

鄔紳一首

紳字佩之丹徒人嘉靖癸未進士有中憲集

寄汪水部淵之

憶昔河梁別春華委芳樹流光何迅速朱夏忽云暮園  
林莎雞鳴檐隙疎螢度向晚輟簿書中庭浥微露搔首  
重踟躕無亦以君故使者舒城來多君眷南顧遺我以  
先春開我以尺素殷勤報秋期江皋諧夙晤我欲往問



之蒼波渺烟霧悵望寂無言鳴琴寫情悵

陳 襄 一首

襄字邦進寧德人嘉靖癸未進士有騶山集

燈花

倦矣經年客歸與萬里家遠書期不至空自卜燈花

馮世雍 一首

世雍字子和江夏人嘉靖癸未進士歷官徽州

知府有三石橐

赴滇南煙莊道中

碧嶂千峰合黃茅一徑開  
馬從危石度人自亂山來  
暝樹青溪濕寒雲白鴈哀  
漫停湘浦駕遙望漢江臺

劉汝松一首

汝松字貞吾歷城人嘉靖癸未進士歷官知府  
送李進士之京

春風吹岐路朝日照高城  
青陽既駘蕩林薄亦芬榮  
之子去安適迢迢入承明  
皇居一何麗雙闕凌太清  
白馬

振長綏丹陛羅羣英匪才慚寡用高步羨芳聲盛年志  
四海豈徒夸令名

朱  
泚  
四首

泚字必東莆田人嘉靖癸未進士授湖廣道御

史建言廷杖放歸有天馬山房遺橐

林雨可云  
損巖下筆

清健一種疎宕之  
氣足以移人性情

詩話興國太后將至禮部議由東安門入覆議  
由大明左門入張璁曰雖天子必有母也焉可  
由旁門入乎於是從大明中門入在永陵意中  
惟知有興國太后而已嘉靖三年值慈壽皇太

后誕辰有旨命婦免朝賀損巖上言興國太后  
朝賀既已舉行慈壽誕辰乃聞報罷事體相類  
禮數頓殊臣切念武宗上賓蒼生無主當時為  
孝廟後者惟慈壽所欲立爾手提神器親授吾  
皇孝宗在天之靈所以望陛下之事母后者何  
如天下臣民之心所以望陛下之事母后者何  
如今乃旬月之間一舉一罷彼此相較形迹太  
分何以慰孝宗在天之靈副天下臣民之望疏  
入永陵震怒匪蔣文定力救不能生矣同時疏  
諍者馬侍御明衡也二公可謂格君心之非者  
損巖詩無俗韻  
誦之想見其人

## 歲暮山中

種梅山逕邊下有牛羊道童登恣攀翻糾纏易枯槁殷

勤謝鄰翁愛此寒花好放牧須前山前山足豐草

飲黃石友人黃正可晚青亭和師山題壁

漫影落名山歲月累云周如何咫尺地茲亭今始游小  
草冒庭戶寒花明牆隙撼撼高樹聲蕭然似林丘西風  
天欲暮雨意鳴靈鳩主人有好懷開尊更獻酬相與各  
賦詩談笑銷百憂愛此同游人俱維靜者流盍簪誠足  
樂萬事吾何求

贈豐山陳子廷

我愛豐山無俗韻時時來徃小齋中野情自比天隨子  
詩句多師陸放翁環堵蕭然無一物才名早已動諸公  
長吟盡日不知厭興入冥冥海上峰

草堂前芙蓉正吐口占

清霜一夜老蒹葭牆角芙蓉漸著花猶憶昔年江上看  
西風吹夢客思家

盧 襄 一首

襄字師陳吳縣人嘉靖癸未進士官職方郎中

有五塢山房豪

一谿

一道縈村曲何年有此谿微風生細浪過雨失平堤漁  
漁舟相續仙源路不迷幽棲我亦戀夢繞石湖西

狄

沖

七首

沖字仲虛溧陽人嘉靖癸未進士歷官南京工

部郎中有春谿集

陳山父云春谿思致雋爽體裁各軌其度音調亦道

詩話春谿歷仕不達晚乃為郎故其詩云官衙  
四轉轉萬里垂老始博尚書郎其詩清澈類楊

夢山特全篇

合作者少

臨淮思

淮之水兮清且瀏思若人兮情夷猶  
予舟兮夕逝願從之兮靡由  
淮之水兮清且駛思若人兮不能已  
抱多病兮焉投隔淮湍兮千里  
淮之水兮洋洋睠我情兮難忘  
永悠悠兮冬夕輾轉反側兮未央  
悲莫悲兮生別離我思君兮君不知  
臨北風兮隕涕屬孤雲兮南馳

東寺竹



林鳥已春聲林竹尚寒影豈無竹外花愛此晚色靜褰  
蘿拂苔石透手弄清冷飛鼠迭相竄驚鱗時一逞慙非  
海上翁動物見猶警

自銅仁至八盤

峒嶺度修坂窈窕穿林木野燒楓半枯陰厓草全綠獸  
銚或衝人鳥嚶如度曲羣猿不畏人聯臂下江浴人言  
此道險欣籍吾方足肩輿吟且眺一一得所欲月出江  
上峰夜上峰頭宿何似長安塗飛埃眯人目

德州道中

遠道嗟難到，舟行觸凍流。  
山城寒擊柝，客夢夜封侯。  
岸鳥棲還警，村猿吠不休。  
篙人真楚產，助力發蠻謳。

谿上

原樹明殘日，谿風埽斷雲。  
衆山圍野並，一水向田分。  
魚戲推萍轉，樵歌隔嶼聞。  
隱居逢此地，無事歎離羣。

冒雨入白鹿

樹杪雨來風有聲，肩輿且並樹邊行。  
路傍鳥去葛花落。

水面魚游蓮葉生山接流雲多變態澗添行潦亦爭鳴  
此來老子興不淺巾折衣霑踏草坪

喜晴

東郊奄奄雨意足南郭浮浮雲脚收  
鷓鴣刷翎水北岸蜘蛛添網門西樓  
虹垂古澗青紅氣日射蒼波紺碧流  
曾苦妨農何事喜桔槔閒卧夕陽洲

柯維騏 二首

維騏字奇純莆田人嘉靖癸未進士官南京戶

部主事有藝餘集

謝山子云先生閉戶五十年  
故意著述自成一家詩以積

學勝人

不易託

詩話宋遼金元四史惟金史差善其餘潦草牽率豈金匱石室之所宜儲希齋撰新編會宋遼金三史為一以宋為正統遼金附焉升瀛國公益衛二王于帝紀以存統正亡國諸叛臣之名以明倫列道學於循吏之前以尊儒歷二十載而成書可謂有志之士矣其詩文曰藝餘者編宋史之暇作也先是揭陽王昂撰宋史補台州王洙撰宋元史質皆略焉不詳至柯氏而體稍備其後臨川湯顯祖義仍祥符王維儉損仲吉水劉同升孝則咸有事改修湯劉橐尚未定損仲宋史記沉於汴水余從吳興潘氏鈔得僅存然三史取材紀傳則曾鞏王偁杜大圭彭百川

葉隆禧字文懋昭編年則李燾楊仲良陳均陳  
經禮樂則聶崇義歐陽修司馬光陳祥道陳暘  
陸佃鄭居中張暉職官則孫逢吉陳騏徐自明  
輿地則樂史王存歐陽志稅安禮王象之祝穆  
潘自牧著錄則王堯臣晁公武鄭樵趙希弁陳  
振孫類事則徐夢莘孟元老李心傳葉紹翁呂  
中馬端臨趙秉善劉祁述文則趙汝愚呂祖謙  
諸書具在以予淺學亦曾過讀其他宋金元人  
文集約存六百家郡縣山水志以及野史說部  
又不下五百家及今改修文獻尚猶可徵予嘗  
欲據諸書考其是非同異後  
定一書惜乎老矣未能也

別黃道卿

繁霜肅野草迴飈振城樹胡為子遠行值茲歲云暮我

屢不出門為子臨岐路子驟亦暫停豈不以我故我如  
蒿下鳥子如雲中鷺動息各有宜安得長會晤會晤不  
須期努力慰所慕

宏路驛

雨歇江天淨山迴驛路遲客愁新歲減風物故鄉宜花  
事餘梅蕊樵歌綴竹枝祇慙司馬病深負好文時

豐坊一首

坊字存禮鄞縣人嘉靖癸未進士除禮部主事

以吏議免官家居坐法竄吳中改名道生字人

翁有南禺集

張惟靜云存禮質稟靈奇才彰卓詭論事則談鋒橫出摘詞則藻撰

立成士林擬之鳳毛藝苑方之逸駟然而性不諧俗行或盪中片語合意輒出肺肝相啗睚眦蒙嗔即援戈矛相刺亦或譽嫺母為婢娟斥蘭荃為蕢菜苟若無人罕所顧忌知者以為激詭不知者以為窮奇也由是雌黃間作轉相詆譏出有爭席之夫居無式閭之敬鵲衣縑縷濕突不炊僮奴絕粒而通亡賓客過門而不入頗領窮獨以終其身不亦悲夫

王元美云豐道生

如沙苑馬駑駿相半恣情馳騁中多敗蹶

詩話南禺釋褐後從其父學士熙諫大禮受杖闕下人方謂學士有子矣建父卒成所乃言非

父本意忽走京師上書請追崇興獻王宜稱宗  
入太廟永陵用其言而不錄其人也歸益狂誕  
恃才傲物作偽欺人撰子貢詩傳申培詩說魯  
詩世學古書世學石經大學竄易經文別裁異  
議一時若泰和郭氏京山李氏澄海唐氏多惑  
之而不知本邪說也芝園一序可當聲罪檄而  
憐才美意寔寓其中此等人第作犬豕相遇可  
耳詩不必存錄而論列之期以祛後人之惑也

### 十月十一日作

去國已逾紀玄節及茲臨修軌忽電逝壯懷終陸沉淒  
淒寒露結悵悵悲風吟芳草委遙澤驚鳥翔空林朝飛  
尚蠅羽夕寐惟蟲音馳情有斷簡卒歲無重衾餘悰奚



足道雲海勞予心

明詩綜卷四十四